

05 AUG 1996

Fiji-Sambutan

SAMBUTAN RASMI UNTUK PERDANA MENTERI FIJI

KUALA LUMPUR, 5 Ogos (Bernama) -- Perdana Menteri Fiji Sitiveni L. Rabuka, yang tiba semalam untuk lawatan rasmi tiga hari, diberikan sambutan rasmi di Medan Parlimen pagi ini.

Rabuka disambut oleh Perdana Menteri Datuk Seri Dr Mahathir Mohamad dan isterinya Datin Seri Dr Siti Hasmah Mohd Ali setibanya di medan itu.

Rabuka, yang diiringi isterinya Suluweti Rabuka, mengetuai rombongan 18 orang untuk lawatan itu yang bertujuan memperkukuhkan hubungan antara Malaysia dan republik itu.

Rabuka dan Dr Mahathir berdiri di pentas khas ketika Pencaragam Pusat Rejimen Askar Melayu Diraja diketuai Leftenan Norman Kamaruddin memainkan lagu kebangsaan Fiji dan Malaysia.

Pemimpin Fiji itu kemudian memeriksa perbarisan kehormat terdiri daripada 106 pegawai dan anggota Rejimen Pertama Askar Melayu Diraja diketuai Mejar Nor Azmi Karim.

Rabuka kemudian diperkenalkan kepada menteri-menteri Kabinet Malaysia dan anggota kor diplomatik.

Rabuka akan menghadap Yang di-Pertuan Agong Tuanku Ja'afar tengah hari ini sebelum mengadakan rundingan dengan Dr Mahathir di Jabatan Perdana Menteri.

Beliau akan melawat Menara Kuala Lumpur yang baru dibuka petang ini. Malam ini, pemimpin Fiji itu akan menghadiri jamuan malam di Sri Perdana.

-- BERNAMA

HS AKD